

DAHMAHTA LENG LUNGKIM

Khat apiang khatin i si a, simlei luahting kuamah hongkiseh kha lo hi. Sihna in mihingte ngaihsutna ii abatzawhloh gungal khatah i it i ngaihte tawh hongkikhen sakin, lainatna tawh lung zuan luankhi nulding lo ngal, i hih theih a omkei hi. Apai ding te paipai in, eima ni ding ngakdiamdiam in, eima ni leh hun ding masuan gige in i nungta hi. Theihloh ni in, kahun hong tungding hi cih i phawkkhak loh hangin, tuabangni tawh kaki pelhtheikei hi cihthu i phawk ngitngat hi. Paikhinsate hanmual lamzuan in i kha a, eihongkha dingkua hiding hiam cih i thei zo tuankei hi. Hanmual khumsa it leh ngaihte, tu in koi ah sawlbang heita hiam ci-in, laidipnem in i om a, luankhi tawh muikhuazing in, lainatna in sinlai gubang hongzen in, i thum a, i tau hi. Hehnemthei miza in tammah taleh hehnemzo ding mi i mu zoeki hi.

Tuabang khasiatna lunglenna, dahna leh kahna te kawm kal ah, hanlam manawh in i tai a, hanmual lumsa itngaih lawmgual sambangzalna leimun zangah naubang kapin i om thei hi. Lunglenluat ma'n khuadadk in, ahi zongin huihkhi damnung hiahiau longal eite luankhi hongnulding omlo hi. It ngaih zalna leimun tungpan, RIP: Rest in Peace - Topa sungah Tawldam ta in, cih kammal te sim kawmkawm in suahni sih na, ciahni kuanni laimalno te'n Topa' kikhaina limlak ahi Singlamteh tung mun nala hi. Hanah paihang kuamah omlo, leibek suangbek, singkung te bek na om a, ei hongdawnding, ei hong hopih ding, kuamah na omlo banah, leisungah khaici bang akituhsa itngaihno sambang azalna nangawn ah, amah na omnawn lo in, leitangbek mah na om lai hi. Aw...laumah sing. Amah koi ah om ahi tam maw? Aluang nangawn na omnawn lo ta. Amah koi laipai a, bang suakta ahi zentam maw? Mary Magdalene in Topa hankhuk gei ah akahna, athumna aw te pen, eite thuumna, eite kahna aw ahihlam i tuah khakciang bek in i thei a, i tel pan hi. Amah koi ah om ahizen tamaw...?

Ahi zongin itngaihno luanghawm i muhnawnlohna in, amai mang hilo zaw in, asi te gamah, asi te lakah anungta Topa zongin, amulo Mary Magdalene mahbangan, eite inzong, leitung mittawh, leitung misi te lakah i it, i ngaih nu/pa luang hawm i zon manin i mu zonawn kei a, leitungbek mah i mu ta hi. Topa' luang hankhukah omnawnlo hi (Jh 20:1ff) cih phawk kawmkawm leh, tua hankhukah i muhnawnloh Topa pen tho kik takpi hi (Jh 20:1ff) cih Laisiangtho tungtawn in thei in, i uptheihna in, ei Christian te ii hamphatna, ki heh nepna, khamuanna, lungkimna, lungmuanna hong hihi. Tua bek tham lo in, Misiangtho Paul in Topa sungah eite khem peuhzong athokik ding i hihna thu (1Cor 15: 1ff) siangtak leh teltakin hong gen ahih manin, Christian i hihna ii manphatna in, sihna dahna i thuak hunciang hongkilang hongkitel semsem hi.

Topa thawhkikna sungah upna picing i neihna in, sihtheih nawnlohna zatui ahihi. Topa' thawhkikna in eite thawhkikna ding kongpi honghonsak hi-in (cf Rom 8:28), amah a ummi leh amadeihna tawhkituak in anungta mikhempeuh te zong ama thawhkikna vangliatna puan asilhdingte ihihi (1Cor 15: 12, 2 Cor 2: 14). Topa thawhkikna sungah keizong kathokik taktak dinghi, amahzong thokik taktak dinghi, ci-in upna picing neihna in, i ngaihsutna, i muhna, i thu theihtheihna te ah asangzaw, asiangthozaw, apicingzaw, Pasian tawh akilawm zaw in, nisim nisim in honglamsang hi. Hici bang upna in, **upna hat** ii manphatna, thupi'tna leh vangliatna te atangzai zawin hongtheisak, hong itsak, hong pomkipsak thei hi. Tua hi in, nisim nuntakna ah, ahoihzaw mi, asiangthozaw mi, akilem theizaw mi, amigi zaw mi, adikzaw mi, athumanzaw mi cih bangan hoihna lamah kalkhat khith kalkhat honglam toto in, nikhatni ciangin, nakhempeuh kicinna, hoihnakhempeuh phungpi, tawntung nuntak nopsakna gam amakiang hong tunpih ding ahihi. *Maranatha* - Come, Lord Jesus! (Mang 22:20).